

SU PASTORE SARDU

Cantende su pastore a boghe giara,  
Cand'est sazziu 'e pasculu s'armentu,  
In sos virgines buscos de Limbara  
O in sas faldas de su Gennargentu,  
Innalzat sa Sardigna, amada e cara,  
In s'alabinna, a riparu 'e su entu.  
E in s'istiu, a s'umbra 'e su nuraghe,  
Custodiat sa roba in santa paghe.

In su monte, in s'adde, in su pianu  
Sunu tottu sas gamas pasculende.  
Fattende festa a su blandu 'eranu  
A gruppos sos anzones sun gioghende.  
Su pastore, in su placidu manzanu,  
Notas melodiosas est sonende.  
Cun su paffaru sou armoniosu  
Tottu su logu lu rendet festosu.

A su sero recuit a coile  
Pro reposare masones e gamas.  
Chirriat sos anzones a s'annile  
Poi chi tottu hana suttu sas mamas.  
E azzendet su fogu in su foghile,  
Osservat chi pianas sun sas lamas  
De latte friscu, murtu assora assora,  
Iss'est cuntentu e poetada ancora.

Pro esser solu non bi ponet cura,  
Sos puzzones l'han sempre accompagnadu.  
Ponet sa voluntade, sa premura,  
Pro sa laghinza e pro su madrigadu  
E vivet in sa calma 'e sa natura  
De unu pleniluniu incantadu.  
A su santu eremita s'assimizzada,  
Però diversa vida non disizzada.

Passat sa vida d'un'anacoreta  
Isgranende calch'un'orassione.  
A s'umbra d'unu cherou o de pineta,  
Giughet a meriare su masone.  
No est poeta e si faghet poeta,  
Cantat versos de sua invenzione  
E reposat in terra, allegru e samu,  
subra sa uda o subra su cabbanu.

"Lucet in tenebris"

EXTRA STRONG

MUSTRENDE S'ESISTENZIA DE DEUS.

In d'una notte calma de istiu  
Cuntemplende sas tremulas istellas,  
Chi palpitan'azzesas e cun briu  
Tottu lughentes cantu sunu bellas!  
Cando su sole a terra dât s'adiu  
Chi lassat cosas bezzas e novellas,  
Sa luna pensat de illuminare  
Cun raggios de arghentu, terra e mare.

In sa rosada lughe 'e manzanile  
Cando est su criadu evanescente.  
Cando s'assendet s'eternu foghile  
Ch'allegrat'ogni coro e ogni mente,  
Tando zente sivile e insivile  
S'oper' 'e Deus la tenet presente,  
E iafusat in Santa poesia  
Tantu fascino bellu e armonia.

De s'uraganu s'orrendu fragore  
O sa rabbia sega de sos bentos;  
O s'urulu paurosù 'e su dolore  
Su chi tottu travolget permanentos,  
O s'ira de su laspu, o su bagliore  
Chi movet furiosos elementos.  
Cosas fattas da' Deus in essenzia  
Bonidade, rigore e sapienzia.

Cando, in unu campu fluttuante  
De trigus, osservas maduras ispigas  
Biundas a su sole; in cuss'istante  
Non peneas, chi de Deus sun'amigas?  
Tottu custu ti siad'appagante  
Ca Deus lassad'ornas e istigas.  
Sos campos birde, o su buscu umbrosu  
Sun'operas de Deus poderosu.

Abbaidende superbu ispettaculu  
D'immaculados montes, a Deu adoro.  
A vista mia, non faghen'ostaculu  
Sa magestade e lughentessa issoro,  
Proite penso, ch'est'unu miraculu  
S'issos ispiccan nitidos che oro;  
E si mandan bagliore cristallinu  
Est'opera de s'Artefice Divinu.

*"Lucet in tenebris"*



## MAMA

Tra sas espressiones pius caras  
Su narrer Mama, non b'hat mezzus cosas  
Sa frase chi fiorit in sas laras  
Mam'est una paraula amorosa,  
Est giara lughe, tra sas lughes giaras,  
Simbulu de affettu e virtuosa.  
Destat intimas gicias in coro,  
Mama, lughe perenne ed est tesoro.

Suave criadura 'e sacrificiu,  
De bonidade e de amore immensu,  
Curreggis e appartas d'ogni viziu  
Cun su risu in sa 'ucca e bonu sensu.  
Mama, de sa virtude ses s'indiziu  
E cheres profumada cun s'inzensu.  
Mama, alidu caldu 'e passiensia,  
Isperanza e cunfortu 'e s'esistenzia.

Mama, sas breves sillabas in sinu  
Passan sa manu in carignos de fada.  
Mama est accordu musicu e divinu,  
Melodia che' cussa non bind'hada.  
Mama, ghi ses che crastu adamantinu,  
Che granitica rocca piantada.

Mama, breve pronunzia chi non moridi  
In ogni 'ucca isbocciat e fioridi.  
Mama, ti giamat in bellu suguriu  
In domo lussuosa su potente.  
Mama, 'enis giamada in su tuguriu  
Inue abitat sa povera zente.  
Mama, tue sullevas su marturiu  
Ses guida e cunfortu a su dolente.  
Mama, tue allezzeris tantos males  
In sas corsias de sos ispadales.

Mama, ti giamat ognuna persone  
Finza in sa solitaria campagna.  
Mama, ses sa celeste visione  
De tottu inseparabile cumpagna.  
Sos poetas in ogni occasione,  
Dae sa pianura a sa muntagna,  
Cun dulches versos ch'a su coro falana  
E cun rimas superbas t'immortalana.

"Lucet in tenebris"